

Da senioras per scolarets

Casa da tgira Puntreis ei separticipada all'acziun «affons tarlischonts»

DA HANS HUONDER / ANR

■ **Gest per l'entschatta dalla emprema neiv han scolarets da Mustér obteniu il gliendisdis novas capetschas.** Ellas ein fatgas per part cun fil tarlischont. Aschia ein ils affons meglier vesibels el traffic. La Casa da tgira Puntreis ei separticipada all'acziun «affons tarlischonts». La fina-

mira da quella ein capetschas e fruntagls bein vesibels el traffic, surtut cu ei fa brin ed ei stgir. «La segirtad dils affons ha motivau mei da dar igl impuls da separticipar alla campagna. Sin quella moda havein nus denton era saviu promover la convivenza e far la punt denter generaziuns», di la geraua *Jris Lombris-Manetsch*. Alla surdada dallas capetschas als 52

scolarets da Mustér/Medel ha il menader dalla casa *Diego Deplazes* sutlingiau il grond engaschament en favur da quell'acziun. Sut l'egida da *Regina Caminada* ch'ei engaschada en favur dallas activitads en Puntreis, ei vegniu fatg stediamein caltschiel las davosas jamnas.

➤ PAGINA 3



La coordinatura Regina Caminada (davos amiez) ensemen cun senioras che han fatg las capetschas, circumdadas d'affons.

FOTO H. HUONDER

6000 capetschas e fruntagls per affons

Casas da tgira, uniuns da dunnas e dunnas s'engaschan en favur dalla prevenziun

■ (anr/hh) Ils davos meins han biebein 100 casas da vegls e da tgira, 22 uniuns da dunnas e 108 dunnas fatg rodund 6000 capetschas e fruntagls tarlischonts per affons dalla scoletta e dalla primara. Grazia a fil tarlischont nezegiau denter la launa ein ils affons megliers vesibels da stgir el traffic. L'acziun ei ina part dalla campagna da prevenziun «Vorbilder leuchten». Biars carstgauns sils onns han il desideri da saver viver aschi ditg sco pusseivel a moda independenta. En quei connex gioga era la mobilitad in'impurtanta rolla. Savens ein carstgauns pli vegls denton limitai en lur movibladad. Aschia sereduceschan las qualitads da reacziun e cordinaziun. In ni l'auter pitescha denton era dalla vesida ni l'udida. Cun la vegliadetgna crescha era la resca d'accidents el traffic, surtut cura ch'igl ei stgir ni schliata vesida muort l'aura. Pils pedunzs eis ei per quei motiv impurtont da purtar vestgadira bein vesibla.

Tarlischont ed elegant

Per sensibilisar gliedud sils onns per dapli segirtad sin via, ha la «Fundaziun Terz» lantschau la campagna «Vorbilder leuchten». Quella vegn sustenida finanziamein dil Fond per segirtad el traffic FVS. La finamira dalla campagna ei d'animar senioras e seniors da purtar vestgadira ed accessori che reflectescha e da mussar che tala moda ei buca mo d'avantag per la segirtad, mobein sa era esser eleganta. Per quei motiv vegn organisau duront in-



Il gliendisdis han ils affons retschert las capetschas «glischontas» en Casa da tgira Puntreis a Mustér.

FOTO H. HUONDER

tir onn ell'entira Svizra differentas acziuns davart quei tema: Presentaziuns da films e da products cun occasiun d'arranchaments regiunals, publicaziuns d'informaziun sin flyers ni stans d'informaziun ad expositziuns. Il discurs direct cun senioras e seniors stat el center da

quellas acziuns. Els duain vegnir motivai da far attents autra gliedud sin quella messiras da segirtad.

Biebein 100 instituziun partecipadas

Sco quei che la fundaziun scriva en ina communicaziun als mieds da massa, du-

essen ils seniors denton buca mo esser buns ambassadurs per lur gruppa da vegliadetgna, mobein era pils giuvenils. Per quei motiv ei vegniu lantschau il project «procurar per affons tarlischonts». Per quella campagna ha la fundaziun saviu animar 102 casas da vegls e da tgira ella

Svizra tudestga e romontscha. Ils davos meins han senioras e seniors numnadamein fatg caltschiel ed aschia procurau per capetschas e fruntagls ord launa cun fil tarlischont. Se partecipadas a quella simpatica acziun ein denton era 22 uniuns da dunnas e 108 dunnas. Las capetschas ed ils fruntagls vegnan mess a disposiziun a rodund 6000 scolarets e scolars dalla scola primara. Cun occasiun dil di d'acziun dad ier ein las capetschas ed ils fruntagls vegni surdai als affons, era en Casa da tgira Puntreis a Mustér.

Seniors sco ambassadurs

Il project «affons tarlischonts» el rom dalla campagna «Vorbilder leuchten» persequitescha gest pliras finamiras. Dad ina vart vegn giuven e vegl sensibilisau da purtar vestgadira cun elements tarlischonts. Da l'autra daventan participontas e participonts pli vegls dil traffic ambassadurs ed exempels, buca mo per lur atgna gruppa da vegliadetgna mobein era per affons e giuvenils. Las capetschas gidan a far ils affons pli vesibels sin via. Cheutras ei l'acziun ina contribuziun concreta alla prevenziun d'accidents. La Fundaziun Terz s'engascha en favur dall'indipendenza ella vegliadetgna. En quei senn eruescha ella ils basegns persunter e lantschescha era campagnas davart projects en favur da soluziuns per las generaziuns. La campagna «Vorbilder leuchten» ei coordinada cun la campagna tetgala «Made Visible» dil TCS e dil post da cussegliaziun e prevenziun BFU.